

**«Հայաստանի պետական տնտեսագիտական համալսարան»
պետական ոչ առևտրային կազմակերպության գիտական խորհուրդ**

Ո Ր Ո Շ ՈՒ Մ

30 սեպտեմբերի 2015 թվականի

**Ավարտական աշխատանքների և մագիստրոսական թեզերի
պաշտպանության արդյունքների մասին**

Լսելով և քննարկելով «**Ավարտական աշխատանքների և մագիստրոսական թեզերի պաշտպանության արդյունքները**» հարցը (զեկուցող՝ ուսումնական կազմակերպական աշխատանքների գծով պրոռեկտոր Մ.Ն.Հարությունյան)՝ գիտական խորհուրդն արձանագրում է. շրջանավարտների ամփոփիչ ատեստավորումն անցկացվել է ՀՀ կրթության և գիտության նախարարի 2011 թ. հոկտեմբերի 31-ի N 1197-Ն հրամանի պահանջներին համապատասխան: 2014-2015 ուսումնական տարում համալսարանն ունեցել է առկա ուսուցման բակալավրիատի 297 (նախորդ տարվա 1148-ի փոխարեն), հեռակա ուսուցման բակալավրիատի 424 (նախորդ տարվա 425-ի փոխարեն) և առկա ուսուցման մագիստրատուրայի 482 (նախորդ տարվա 666-ի փոխարեն) շրջանավարտներ, որոնց համար կազմակերպվել են ավարտական աշխատանքների և մագիստրոսական թեզերի պաշտպանություններ: Նախորդ տարիների չավարտած ուսանողների համար կազմակերպվել են նաև ամփոփիչ ատեստավորման քննություններ: Ռեկտորատը, ուսումնամեթոդական աշխատանքների և աշխատաշուկայի հետ համագործակցության ու ուսումնական կազմակերպական բաժինները, դեկանատները և ամբիոնները բավական աշխատանք են կատարել ավարտական աշխատանքների և մագիստրոսական թեզերի պաշտպանությունների կազմակերպումը պատշաճ մակարդակով իրականացնելու և նախորդ տարիներին նկատված թերությունները վերացնելու ուղղությամբ:

Առկա ուսուցման բակալավրիատում դրական գնահատականով պաշտպանվել է 277 (93.3%) ավարտական աշխատանք, որից 57-ը (20.5%) արժանացել են «գերազանց», 70-ը (25.3%)՝ «լավ» գնահատականների. ընդհանուր առաջադիմությունը կազմել է (93.3%): Նախորդ տարիների շրջանավարտներից ամփոփիչ ատեստավորման քննություններին և ավարտական աշխատանքների պաշտպանությանը մասնակցել է 89 ուսանող, որից 75-ը (84.3%) գրանցել են դրական արդյունք (նախորդ տարվա 83/74-ի (89.1%) դիմաց): 10 շրջանավարտ ստացել է գերազանցության դիպլոմ (նախորդ տարվա 145-ի դիմաց):

Ավարտական աշխատանքների պաշտպանությունը գերազանցապես կազմակերպվել է ժամանակակից տեխնիկական միջոցների օգնությամբ:

Ավարտական աշխատանքների պաշտպանությունից 100% արդյունք արձանագրվել է 7 մասնագիտություններում՝ «Բանկային գործ», «Ապահովագրական գործ», «Հողագույքային հարաբերություններ», «Շուկայաբանություն (մարքեթինգ)», «Վիճակագրություն», «Կառավարման տեղեկատվական համակարգեր» և «Հակաճգնաժամային կառավարում», իսկ ամենացածր առաջադիմությունը (85.4%) ցուցաբերել են «Ֆինանսներ» մասնագիտության շրջանավարտները:

Հեռակա ուսուցման բակալավրիատում ավարտական աշխատանքների պաշտպանությանը թույլատրված 424 ուսանողից 381-ը (89.9%) ստացել են դրական, 36-ը՝ «անբավարար» գնահատականներ, իսկ 7-ը չեն ներկայացել: Պաշտպանության արդյունքում 31 ուսանող ստացել են «գերազանց», 95-ը՝ «լավ» գնահատականներ:

Առկա ուսուցման մագիստրատուրայում պաշտպանության է ներկայացվել 481 թեզ (առաջադիմությունը կազմել է 98.5%), որից 292-ը (60.6%) արժանացել են «գերազանց», 94-ը (19.5%)՝ «լավ», 88-ը (18.2%)՝ «բավարար» գնահատականների: Նախորդ տարիների շրջանավարտներից մագիստրոսական թեզերի պաշտպանությանը մասնակցել է 13 ուսանող, որից 11-ը ստացել են դրական գնահատականներ: 166 շրջանավարտ ստացել է գերազանցության դիպլոմ (34.4%)՝ նախորդ տարվա 155-ի (23.3%) փոխարեն:

Խորհուրդը միաժամանակ նշում է, որ ինչպես ավարտական աշխատանքների, այնպես էլ մագիստրոսական թեզերի պաշտպանության կազմակերպման աշխատանքներում դեռևս կան շտկման ենթակա թերություններ և լուծում պահանջող խնդիրներ:

Առանձնացնենք ավարտական աշխատանքներում ու մագիստրոսական թեզերում տեղ գտած ուշադրության արժանի թերությունները և բացթողումները.

- 1) Աշխատանքների մի մասում օգտագործված գրականության ցանկերը շատ աղքատիկ են, նշված են միայն մի քանի աղբյուր: Որոշ աշխատանքներում հանդիպում են համացանցից կամ պետական մարմինների պաշտոնական կայքում տեղակայված փաստաթղթերից նույն ոճով արտատպված նյութեր՝ առանց հղումների: Թույլ են ներկայացվում թեմաների արդիականության հիմնավորումները: Շատ դեպքերում բացակայում են թեմայի շարադրանքի տրամաբանական հաջորդականությունը:
- 2) Ինչպես ավարտական աշխատանքների, այնպես էլ մագիստրոսական թեզերի թեմաներում դեռևս նկատվում են նախորդ տարիների թեմաների կրկնություններ. որոշ դեպքերում փորձառության վայրերը չեն համապատասխանում թեմաներին: Թեմաների տարբերությունը ապահովվելու համար նմանատիպ աշխատանքներին տրվել են տարբեր վերնագրեր: Որոշ աշխատանքներում թեմայի վերնագիրը և շարադրանքը չեն համապատասխանում միմյանց:
- 3) Աշխատանքների մի մասում և հատկապես ավարտական աշխատանքներում բացակայում են քանակական և որակական վերլուծությունները: Սակավ են այն աշխատանքները, որտեղ վերլուծություններն իրականացվել են մաթեմատիկական ու վիճակագրական մեթոդների օգնությամբ: Գրեթե չեն օգտագործվում համակարգչային փաթեթներ: Ավարտական աշխատանքներում բավարար չեն տնտեսական, իրավիճակային վերլուծությունները:
- 4) Կան դեպքեր, երբ մագիստրոսական թեզերն իրենց գիտական խորությամբ և ծավալով չեն տարբերվում ավարտական աշխատանքներից:
- 5) Կան բազմաթիվ կարծիքներ և գրախոսություններ, որոնք չունեն համապատասխան ձև, բովանդակություն, չեն պարունակում հիմնավորված եզրահանգումներ: Որոշ կարծիքներ և գրախոսություններ չեն գերազանցում մեկ էջը:

6) Առկա են ավարտական աշխատանքներ ու մագիստրոսական թեզեր, որոնք ներկայացված են բազմաթիվ լեզվաճական և տեխնիկական սխալներով և առանց խմբագրման:

Ելնելով վերոնշյալից՝ գիտական խորհուրդը **որոշում է.**

1. Հանձնարարել թողարկող ամբիոնների վարիչներին և ղեկաններին.

- 1) ավարտական աշխատանքների համար մինչև 2015 թվականի նոյեմբերը, իսկ մագիստրոսական թեզերի համար մինչև 2016 թվականի մարտը ամբիոններում քննարկել, ֆակուլտետների խորհուրդների նիստերում հաստատել և ուսումնամեթոդական բաժին ներկայացնել ավարտական աշխատանքների ու մագիստրոսական թեզերի արդիականացված թեմաների, կատարող ուսանողների և ղեկավարների ցանկը.
- 2) բացառել ավարտական աշխատանքների և մագիստրոսական թեզերի թեմաների ու շարադրանքների կրկնությունները.
- 3) ամբիոնների և ֆակուլտետների խորհուրդների նիստերում հաստատվելուց հետո բացառել ավարտական աշխատանքների ու մագիստրոսական թեզերի թեմաների փոփոխությունը.
- 4) խիստ կարևորել փորձառության վայրի համապատասխանությունը ավարտական աշխատանքի թեմային, հնարավորինս ապահովել փորձառության արդյունքների արտացոլումը ավարտական աշխատանքներում, իսկ ղեկավարներ նշանակելիս՝ նրա մասնագիտացման ոլորտը.
- 5) առանձնակի ուշադրություն դարձնել աշխատանքների արդիականությանը և եզրակացությունների շարադրանքին, ինչպես նաև նյութի շարադրման տրամաբանական հաջորդականությանը.
- 6) խիստ կարևորել ամփոփիչ ատեստավորման հանձնաժողովների նախագահների և անդամների ընտրության գործընթացը.
- 7) ներկայացվող պահանջներին չհամապատասխանող կարծիքներ և գրախոսություններ ներկայացողների հանդեպ կիրառել պատժամիջոցներ:

2. Սույն որոշումը քննարկել բոլոր թողարկող ամբիոնների և ֆակուլտետների խորհուրդների նիստերում:

3. Սույն որոշման կատարման նկատմամբ վերահսկողությունը վերապահել պրոռեկտորներ Պ.Ա.Քալանթարյանին և Մ.Ն.Հարությունյանին:

Գիտական խորհրդի նախագահ

Կ. Լ. Աթոյան

30.09.2015 թ.